

17 DEC 2001

Najib-Perubatan

MALAYSIA HANTAR PASUKAN PERUBATAN TENTERA KE PAKISTAN

KUALA LUMPUR, 17 Dis (Bernama) -- Malaysia akan menghantar satu pasukan perubatan daripada Angkatan Tentera Malaysia (ATM) ke khemah pelarian Afghanistan di Pakistan Ahad ini.

Menteri Pertahanan Datuk Seri Najib Abdul Razak berkata pasukan perubatan ATM itu akan diiringi oleh satu platun tentera darat yang akan bertindak sebagai pasukan pengawal yang dilengkapi dengan persenjataan ringan.

"Pasukan perubatan itu akan diketuai seorang pegawai berpangkat Leftenan Kolonel dengan 66 anggota termasuk 30 anggota perubatan," katanya kepada pemberita dalam sidang media di kediamannya di sini.

Beliau berkata penghantaran pasukan perubatan itu dibuat setelah Perdana Menteri Datuk Seri Dr Mahathir Mohamad menyatakan hasratnya supaya ATM menghantar satu pasukan perubatan bagi membantu pelarian Afghanistan.

"Hasrat ini dikemukakan semasa Majlis Rumah Terbuka di Seri Perdana semalam dan saya telah berbincang dengan panglima ATM dan pengarah kesihatan ATM mengenai penghantaran ini," katanya.

Najib berkata pasukan perubatan ATM yang komposisinya terdiri daripada seorang pakar bedah, seorang pakar bius, dua pegawai perubatan serta 21 anggota paramedik serta anggota sokongan perubatan lain akan dapat mengendalikan 200 pesakit luar serta dua kes pembedahan utama setiap hari.

Pasukan itu akan mendirikan sebuah bilik bedah, sebuah wad dengan kemampuan 10 katil rawatan mudah alih dan 15 katil pemulihan selain kemudahan makmal serta kemudahan X-ray dan stor perubatan.

"Pasukan ini akan bertugas selama dua bulan dan jika penugasan melebihi dua bulan, ulangbekal dan penggantian anggota akan dirancang," katanya.

Beliau berkata misi utama mereka ialah membantu pelarian Afghanistan terutama dalam masalah kesihatan seperti penyakit saluran pernafasan, penyakit kulit, penyakit berjangkit, penyakit usus, demam kepialu dan pemakanan.

"Pasukan perubatan ATM dijangka bertolak Ahad ini (22 Dis) dengan menggunakan dua buah pesawat pengangkut Tentera Udara Diraja Malaysia (TUDM) jenis Hercules C-130," katanya.

Beliau juga berkata Dr Mahathir Mohamad akan menghubungi Presiden Pakistan Jeneral Pervez Musharraf untuk memperolehi kebenaran dan keizinan penugasan ATM.

"Ini kerana pasukan pengawal akan dilengkapi persenjataan ringan dan memerlukan kebenaran kerajaan Pakistan," katanya sambil menjelaskan tarikh penghantaran itu tertakluk pada perubahan.

Najib juga berkata pada masa ini, pihaknya belum dapat memutuskan tempat pasukan perubatan itu akan ditempatkan di Pakistan tetapi adalah dijangkakan di salah sebuah kem pelarian.

"Tempat sebenar mereka ditempatkan dijangka diketahui dalam sedikit masa lagi," katanya.

-- BERNAMA

AT DC PR